

敦夙好齋詩全集

敦夙好齋詩初編卷八

壬寅九月
至十二月

漢陽葉名澧翰源著

北來集

將發鎮遠留別俞秋農大令

汝本

七十二重灘色暗歸人東下一舟輕
數聲殘角江城曙

相見橋邊我欲行

相見橋在
鎮遠城外

九月二十四日鎮遠登舟

塞行疲澤梁倏忘歲月邁衰柳垂山阿
巖序忽已屆心馳白雲遙纜解翠巒外
餘輝斂曲渚暮禽返荒砦淒景

感雨霜織條奏風籟迴望黔南峯游蹤未云快葆茲千
金軀敢忽垂堂戒我勞何以休鼓櫂下驚瀨

沅江雜詩十首

黔山往日啟莊豪直渡頭闌萬仞高終古牂柯江上路
楸船惟見榜人勞

青溪縣前千尺清鷄鳴關上鷄初鳴君今欲下沅江去

月黑灘長不可行

鷄鳴關在青溪縣城西五里山巖險峻下瞰青江

東山西山玉作屏山半雲流繞郭青只惜匆匆下灘去

不會舟向畫橋停

東山西山爲玉屏縣之勝

金馬碧鷄事若何當年漢使此經過洞簫一賦無人問

哀怨流傳徼外多

玉屏舊平溪衛邑人鄭氏取竹作洞簫分寸節度皆與古合家傳此技數

百年矣

小姑窈窕大姑長霧鬢雲鬟倩女裝見說年年風雨惡

蠻天何處覓彭郎

小孤大孤皆灘名俗亦訛孤爲姑殊可笑也

龍溪口外估人謳荒驛何年更置州傍晚停舟問來客

開帆可在漢江頭

晃州舊驛今改爲直隸廳前里許龍溪口爲全楚村市估船極多

長橋如帶卧晴波無數船窗映水多但少女桑三百畝

依稀風景似嘉禾

沅州城外龍津橋俗呼爲江西橋橋長里許下有圓洞十六上蓋木板構

木爲屋兩旁
列肆貿易焉

西風撲面驛亭寒楚女竹枝歌已闌寂寞幽情寄空谷

亂山深處幾人看

沅州有古驛曰幽蘭鋪有徐秘者凡兩經過書二詞于壁其一云秋欲暮

路入亂山深處撲面西風吹霧雨驛亭欣暫駐可惜國香風度空谷寂寥誰顧已作竹枝傳楚女客愁推不去語意悽惋見

雲谷雜記

楓落江頭天雨霜扁舟入望古辰陽可憐戰後孤城在

鈴杵聲中弔國殤

將至辰州有一溪可達鎮筸苗穴也城乃征苗時所築後有廟繕垣如

城足資犄角廟外周環萬冢粟彙云皆當日陣亡將士

仙洞蕭條兩度經千山回首望中青灘頭不斷潯浚水

一夜隨風下洞庭

自桃源以上有五溪皆合流入洞庭灘之最險者七十有二

舟下玉屏過水月庵

庵祀楚屈大夫相傳兵變時見形澤畔兵爲辟易

弭櫂鷄鳴關遙見三閭祠長橋駕飛壑梵宇臨蒼陂陰
庭蘚痕合古屋松響披繽紛耀冠佩晝藹藹揚雲蜺倚劍
蕩妖霧天外何陸離孤忠未寂寞毅魄猶在茲千載依
郢都懷沙徒爾悲窈窕沅湘水夷猶生遐思願言擷蘋
藻申薦江之湄

便水驛夜泊

維舟依獨戍空闊夜多驚巖霧冥冥散江流汨汨生依

人殘月色感客亂鴉聲天末勞歸夢高堂計遠程

凌霄宮 并序

宮祀凌霄女沅州奉爲火神居民不虔則立遣神鴉銜
火丸置茅屋兩翅扇之故州多火災舊語云

祝融帝主南方尊離宮統帥炎德敦沅郡復有凌霄女
魏峩廟宇龍虎蹲歲時醮酒薦牲帛鼓聲坎坎江烟昏
頑夫不解信神鬼獍颯突起驚孤村飛鴉萬點掠波赤
扶雲上燭窮天閣中有神人驂螭下指揮如意軍甲屯
霹靂震空駭萬谷精光錯落流電奔夫丁婦壬無讎恩

以水配火陰陽存采旄桂旗蹕江裔帆檣安穩明朝瞰
重過黔陽送客亭有感

怪雨盲風晚不收千山蕭瑟已深秋勞勞送客亭邊柳
又見征人下朗州

重泊洪江驛

重泊洪江驛風光已暮秋鴉聲遙浦聚雨氣晚林浮市
近饒菰筍谿平愜鷺鷗宵分對燈火相識有漁舟

晚過辰谿縣

向夕辰谿縣沿緣去路賒數星含水靜初月傍山斜秋

皇太后聖訓卷之九
名
盡魚梁少天寒鳥語譁泊舟更何處微火渺蒼葭

十月初三夜月

辰谿道中

歲序漸搖落溪流入望間
霜容催萬木風色動諸蠻
征篋寒衣少江天旅雁還
牂柯千里月送我返柴關

穆天子藏書室

并序

辰谿縣右鐘鼓洞相傳有穆天子藏書室明正統閒樵父入石室見書報縣令令往取之隨風飄散無存許纘曾東還紀程載其事其山與二酉相近

鐘鼓洞中書萬卷穆王八駿之所遺上古大文在宇宙

後有至者無由窺金簡玉字埋荆棘青黃黼黻蟠蛟螭
樵父見之不敢識蟬哀蠹蝕隨風吹君不見汲冢盜發
竹書出孔壁絲竹鳴嗚咿載籍顯晦存乎時祖龍劫火
徒爾爲

筒車

并序

辰沅間農家取水法甚巧壘石溪旁以壅上流之水其
勢奮激設竹車二制如車輪大二丈餘縛數筒緣于兩
輪向內一面受水每筒相距三尺許兩筒間編縛竹板
以遏流水激之使旋一扇激之後扇相繼水滿筒內流

入車項下傾焉復剗大竹受之注于田而晝夜不絕其
制與江南水車異土人名曰筒車所以施之急溜若川
澤平行則非所宜矣

水車俛仰如桔槔屏水更見筒車牢截竹爲輪扇以板
重輪圍徑風水遭百日不雨山田槁置此可免農功勞
翻聯絡角卷空走鴉隊伊啞聲爭號驚湍激澗納深谷
飛花滾雪珠滴槽人將小智笑吾楚汙邪不滿憂心切
匠人遺書我會讀因地之宜殊卑高木牛流馬制莫考
左旋右轉矜所操漢陰丈人忘機者見之能毋嗤汝曹

馬觜崖 并序

辰州南馬觜崖上仙人屋有木無瓦嵌絕壁間如礪鼎
鼎入望人不能至予曾作歌紀之舟下辰州復經崖下
詢諸舟人云前歲有土人縋繩而上啟視木櫃衣物化
灰隨風而滅有錢二貫崇禎年鑄其為兵燹時居民鑿
險遺屋無疑不知何人訛傳為仙人屋也

連峯俯沅江秀出難窮擬有馬踏層霄飲澗利其觜將
毋西極來逸氣橫萬里峯巒阻鳥道竹柏隨風靡丹雘
鏡崖間結搆誰所始烽火息徼南室存人已徙千載儻

歸來清淺悲海水

雷滿塹

辰州城外長橋卽五代時雷滿所鑿塹也

朝擁土圍軍夕拜節度使
建牙吹角武陵山偏州一賊
勇無比荆江東望波濤昏
一時蜂蟻如雲屯黃茅不死
成和尙巨艦載盡和州民

謂成湖也見北夢瑣言

池亭下瞰沅江

浦文身斷髮開蠻府
賓從雜沓絃管張興酣能與蛟龍
舞長橋透池飛晴虹
可憐霸業矜英雄參差樓堞斜陽
裏想見吞鮮醜酒風

辰州城外對月

我行沿澗水鼓柁下千山今夕月明裏狂歌風露間飛
鳥投野渡寒柝動巖關待曉舟爭集蒼茫去路艱

烏鴉口

古驛蕭條客思長江風吹雨夜初涼烏鴉口外橫孤艇
不待聞聲已斷腸

朔風

朔風轉淒厲竟夜倚孤篷何處飛寒瀑灘聲落萬重林
端未圓月天外斷征鴻幽思無人共猿啼薄霧中

辛女巖

茲山號辛女石壁倚風斜
激濫開明鏡沖瀾動遠霞
泉聲鐘磬外樹色狔狔家
風土槃瓠舊荒祠叫晚鴉

曉起詠白鷺

曉色初晴白鷺飛
生來祇是掠魚肥
渡頭霞散明如畫
一路隨舟下翠微

夜下青浪灘

月落眾星高朔風永夜號
孤舟爭亂石哀狖滿林皋
欲控空同鶴真乘渤海黿
平生慕宗慤破浪敢云豪

崖石

不知其名

自別江南後，茲山似富春。
天風送征客，空翠媚漁人。
雨重低行柂，烟消見去津。
滄洲待知己，棲隱此垂綸。

回望

回望黔中路，艱難去客情。
白雲懸鳥道，翠瀑隱猿聲。
蛇虺迷朝瘴，松篁向夜清。
武夷歌一曲，寂寞漢時營。

漾舟

漾舟萬山裏，歸思水俱東。
危石雲穿竇，長風鳥颺空。
雪霜摧短髮，歧路信飄蓬。
中沚多香草，愁心暮靄中。

桃源舟中乘月夜行至曙

霜落暮天寒，征途信渺漫。
孤舟當永夜，高枕壓風湍。
歷盡波濤險，渾忘歲序闌。
荒鷄啼不斷，涼月落前灘。

招屈亭弔楚義帝

并序

唐劉禹錫武陵書懷序引義陵記云：初項籍殺義帝于
郴，武陵人曰：天下憐楚而興，今吾王何罪，乃見殺郡民
縞素哭于招屈亭。高祖聞而異之，故亦曰義陵。考常德
府志，故址在今武陵縣沅江濱。

楚三戶必亡秦帝也，三戶英雄人真楚。亡假楚起符命，
乃歸赤帝子。楚人縞素招屈亭，三閭死後餘芳馨。傳芭

會鼓沉江渚哭聲上訴于青冥噫吁嘻八千子弟何其
多烏江東渡愁風波氣蓋世兮可奈何

夜泊洞庭湖口

朔氣凝寒陰客憂迫暮歲浩淼洞庭野川途嗟濡滯颯
颯湖風涼亭亭霜月霽孤光靜表裏繁響轉淒厲波濤
浮太清真幸停無際萬象在我前樞機靜方閉因思洪
濛初有生無智慧百年譬飛蓬飄忽孰根蒂矯首延八
荒汎汎舟焉逝

登團山

積水混晝夜誰知洞庭寬中流聳土阜萬古根其間岑
數莫震撼雲物凝幽寒狂飈動大地白日騰滄瀾誰負
底柱功莫茲坤靈患遐觀展跼踖異景窮祿漫夙抱溟
渤想徒悴風塵顏

十月十五夜四鼓自團山放舟至君山下

輕舟泛嘉月愛此夜色幽回望團山巔孤萍漾中流千
聲助我靜冥坐神與游開篷睇四野竹柏方颼颼滅燭
待明發旅思空夷猶

過臨湘縣

北風吹急雁如雪落紛紛挂席我東去寒聲不可聞殘
烟荒浦柳暝色成樓雲故里莽何處江城日又曛

新隄

泗陽州治

秋盡未黃落南天十月暄風聲搖斷岸樹影見諸村涼
降沽魚賤雲低去鳥昏高樓休展眺客思不堪論

遊伯牙臺

萊氏得其地大興
土木爲公讌之所

荒臺化丹碧遠景明離婁欲詢伯牙絃遺蹤難與求天
聲助林木蕭槭如新秋憑虛俯眾象豁我萬古眸邱山
起華屋大雅悲遷流金谷彼何人榮悴良可憂

信陽州

車馬紛如織山程此置州三關聯宛洛一水導淮流
客抱風塵感宵聞雁陣愁欲尋詞賦傑寂寞賸荒邱

謂何大復

先生

明港驛夜遇陳九香

下馬郵亭夕狂歌有故人重逢驚歲月生事溷風塵
淮水蒼茫夜燕山寂寞春離懷何足道黽勉百年身

雪霽自滎澤渡河

層冰十丈鬱嵯峨天際哀鴻雪後多莫向原頭悲廣武

寒風吹我渡黃河

樂城縣客舍贈江曉帆編修

國霖

馬頭塵撲驛亭寒
作客相逢歲已闌
更問滹沱河畔渡
朔風吹雪夜漫漫

十二月十二日抵都喜晤陳頌南蘇賡堂戴雲帆
湯海秋諸君

燕市大風雪
征人千里歸
相思在夢寐
誰分減腰圍
行役久云邁
看雲願不違
眷言事溫清
爲樂及春暉

敦風好齋詩初編卷八終

男恩頤校字

敦夙好齋詩初編卷九

癸卯至
戊申

漢陽葉名澧翰原著

薇省集一

題黃矩卿學士

琮

大通秋泛册子

出郭少塵壙煙水何蒼茫下馬得初霽乘舟聊徜徉輕
鷗沒迴渚白蘋聞遠香同音協笙磬流波浮羽觴暫此
休澣暇邈焉羈緒忘主賓旣已美詠言發浩倡飛鳥帶
客還殘堞明斜陽寫圖紀茲遊後會永相望

又題粵秀山觀海圖

丁酉年典試
粵東時作

南海朝宗大孤峯倚地臨仙官昔奉使獨立最高岑蛟
鱷誅難貸珊瑚網可尋天風奏瑤軫林木滿餘音

秋日集省中諸君飲于觀音院東園

退直軫餘暇羣彥欣追從挈壺適近郊飛蓋依梵宮霽
餘野景豁秋清羣象空高館俯平沼疏檻招涼風嘒嘒
林間蟬蕭蕭雲外鴻晴光散楊柳殘葩綴芙蓉賓筵旣
云醉敬爾思在公

東園憶黃蓉石

京國重來故人少關山匹馬暮愁生東園種柳十圍大

不盡秋風憶汝情

黃子幹

秩林

來自濟甯出詩卷相質

哀雁滿河朔君來秋未深感時詩卷在對酒鬢毛侵倦
馬無南北浮雲自古今西風舊亭館重與聽商音

重展吳紅生丈所裝乾隆壬辰閏九月日諸老輩詩
卷次韻

去年九月賦詩地一葉扁舟沅水間倦客獨聽江上雁
清秋吟望雨餘山游蹤回憶風濤外畫幃重看夢寐間
中歲易增離別感天涯兄弟阻秦關

子昨年重九省兄
黔中舟溯沅水險

敦夙好齋詩初編

卷九

二

而獲夷今伯兄
又移節蘭州矣

秋宵寓直

襪被趨中禁秋宵喜漸長清鐘來縹渺皓月麗蒼茫樹
色含遙鬢鴉啼接曙光爲郎非不達莫遣歎馮唐

題王石谷畫張亨父所贈

石谷自題云紫燕低飛
不動塵黃鶯嬌小未經

春東風綠遍門前草細雨含煙愁
路人甲寅正月四日西園屬畫

江村雨欲晴千里春草碧破曉啼乳鶯垂楊帶長陌開
門一以眺于役愁遠客疏林時復明白鷺去無迹萬象
含餘清虛懷警幽僻舉頭見南山此中可卜宅

題張亨父萬柳堂詩後

感逝傷今淚可憐
秋來不見柳芊緜
素衣銷盡京華土
憔悴風情二十年

九月二十六日識姚石甫丈

整

於海秋坐上張亨

父力疾亦至

浮邱閣上酒百感動中腸
短景寒花媚高城夕照涼
挂帆遵皖水歧路別張郎
松菊歸無恙蕭條舊草堂

先生將歸

桐城

蘇賡堂寓中夜飲二首

車馬填城市狂歌喜汝真相邀明月夜一醉甕頭春有
翼飛先伏藏身屈可伸鄙哉薛生歎取笑負苓人
幼學今茲壯憐予華髮侵所思獨行傳空負百年心杯
酒懽情洽殘燈夜氣深蕭騷風外樹得止羨歸禽

送姚石甫丈罷官歸桐城

君恩許放老臣歸倦馬蕭蕭悵翠微海上樓船摧壯氣
江濱鷗鷺合忘機風煙向晚孤琴冷歲月無情兩鬢非
鴻雁幾行征路永夢魂時傍五雲飛

哭張亨父四首

十月初九日
卒於松筠庵

直諒於今少君胡不我留可憐尊酒罷竟向夜臺求長
物存孤劍高名付一邱填胸千萬事莫慰杞人憂

跋涉三千里艱難爲故人相將歧路別忽慟素棺陳朋

好收遺草松楸傍老親及身無憾事不復淚霑巾

時送姚石

甫丈來都

山陽不可作

四農師

呼舊尙逢君淮水迷前棹燕山愴暮

雲百年幾師友餘事託詩文規我言猶在傷哉未卒聞

朔風吹不止霜雪滿河關路向南天盡魂隨朔雁還他

生猶汝待入夢或相攀寂寞城西路荒祠夕照殷

亨父柩將發酌酒奠之再成一絕

如何送汝長安道不是春官下第時他日松寥閣上望

江風海月慰相思

亨父少時遊吳下登焦山于松寥閣有所取意歸而自號松寥山人

贈朱伯韓御史

琦

清時驄馬客往往出無車閉戶哦詩句中宵草諫書陶

情杯酒外獨抱古人餘青史傳廉吏家聲保令譽

君尊人韞

山文昔官河南有聲

夜赴西苑

簪筆趨西苑勞勞夜未闌明星沈九陌金鑰啟千官閣

道銚光直霜天馬色寒江湖在衾枕儼直夢能安

西苑直廬夜讀宗滌樓前輩

稷辰

近詩

君是夜亦直宿拱辰

樓下

周廬列鱗次皓月臨高樓故人在承明相望非阻修秉
燭哦新詩危坐含綢繆孤松稟貞烈瑤瑟揚清幽持以
謝眾好耳目非所求朔風應候序陽鳥紛南遊厲響續
遙夜歲華倏我邁卷中七閩客淹忽悲千秋念之不能

寐鬱鬱腸萬周

亨父歿已而月矣

送黃海華同守之官湖南

拜官國子學退食衣常鶉一朝銜新命展駕猶逡巡念
當結交來相愛如弟昆今日將遠別贈言難卒陳官微
未足歎升斗皆

君仁瀟湘屏南服山水清且澗昨年崇陽縣殺氣動比
鄰今年武岡州集獍巢荆榛盈虧自天道所哀者斯民
迫呼事鞭扑千室驚鷄豚綺羅被僮阜寒女無完裙公
堂梁肉狀行乞聲不聞誰與司牧者疴癢異厥身初心
變習俗由來非一辰吾鄉富才彥摯誼君所敦讀書乘
先哲晝夜通殷勤設帳古槐下俎豆何莘莘遺經究終

始鉛槧忘朝昏遂令海邦士臨歧聲暗吞

謂琉球入學諸生

大

道無遠邇培植在本根以此展經濟可使茲土醞朔風
起亭埃千里揚埃塵分手卽長道黯然銷我魂扁舟下
黃鵠浩渺長湖春

冬日潘順之

遵祈

補之

希甫

舍人招集省中諸君

席上作

北陸迂修景嚴節凝層陰主人敬愛客休沐捐煩襟薄
曦暖虛室寒颿鳴遠林嘉穀萃珍異清醴盈芳斟逍遙
神諧暢繼繼情彌深嚶鳴眷幽鳥出谷多好音顧此盍

簪樂焉知人事侵遊思慕鄧尉梅花香滿岑

子舊有夢遊鄧尉卷

子二君家吳門故及之

題潘補之小窗梧竹冊子

老屋胥江上蕭蕭梧竹林開軒罕人事冥坐抱秋心涼

月靜相照殘編時獨尋三松失詩叟風雨感何深

三松堂舊

爲君祖榕皋先生讀書處

蔡季瞻吏部移居

薄宦京華久隨身卷軸多移家當歲暮休澣且高歌闌

市託空谷詩心養太和庭閒宜待月期我抱琴過

禴後述哀

壯歲偏多疾，間居感獨真。
書從憂患廢，恨逐歲華新。
入夢依鄉土，棲心問谷神。
壁琴塵盪久，一奏淚霑巾。

宋劉武穆公象

電光如畫陣，雲紫八字軍。
開破強壘，英姿颯爽真丈夫。
笑說太平邊帥子，汴梁城中敵兵來。
鞞尖怒擢聲如雷，鐵騎驕甚揚子馬。
拔營潛遁胡爲哉，王師北伐無消息。
冷山孤臣淚暗滴，臣構偷生國不支。
但許江淮留半壁，柘皋瓜步威如神。
誤國豈獨長腳秦，一腔熱血未能已。

驛館傷心看北使

東丹王故宮歌和富察箕西侍郎

貴慶 東丹王
耶律倍小字圖

欲五代史作突欲事
詳遼史宗室列傳

潢河八部奇首始木葉山頭作天子突欲亦是遼家雄

揮戈直度扶餘東頭魚宴罷頭驚宴營門禩祭傳珍膳

遼史國語解凡出征以牝牡
鹿各一祭之曰禩詛敵也攢隊俄看奏凱歸東樓西

樓拓畿甸柳林當日人皇居車服雍容閑且都峩峩宮

闕躡雲起不數奚首

營帳名

誇穹廬龍錫金佩左右進鵠

軍大小神靈趨有時皇顏示溫霽撒刺

酒尊名

歡騰神速

姑知蛇語者建元稱制登天貢海風沸嶂歌聲慟升中太乙

祠龍眉金齟雕箭知何用龍眉宮太祖所建嘗射金齟箭識之望海堂開

嶽臬閒百城坐擁威如山雉尾交輝羅髻列琵琶拉雜

歌音闌蹊田奪牛鑿不早蹊田奪牛東丹王語見五代史圖書聲色堪

娛老小山突起大山危汴水無情歎蒼昊捺鉢畋漁遊

蹟荒營衛志四時各有行在之所謂之捺鉢隨水草就畋漁歲以爲常家山入夢憂心

擣尺絹寸縑不可收飄零白骨殘僧保空青洞府疑神

仙東丹王買巧石數峯目爲空青府見清異錄興廢休悲良嶽年閭山昨夜

大風雪想見千林射鹿天世傳東丹王有射鹿圖宣和畫譜亦稱其好畫多瓌奇之

敦夙好齋詩初編卷九

作

題宋甄圖卷

并序

甘祺人明經

熙

權寶應教諭數月於學舍傍暨城北甯

國寺故址獲殘甄凡三十有六審其文字有曰淮陰水

軍義士左軍副司右軍皆宋南渡後所置也明經返里

後畫歸裝圖同人題詠甚夥令弟石安禮部同年

熙

復

詳爲攷釋裝卷索詩

淮北烽煙望若雲可憐十七札空聞和戎已劃東南地
戍卒旋開左右軍百戰關山餘敗甕當年寺觀付斜曛

石田茅屋歸裘重冷宦何如鄭廣文

海客琴尊圖爲張仲遠大令

曜孫

題

海客者朝鮮使臣李尙迪

藕船也圖作于道光二十五年乙巳正月二十日會者凡十有八人仲遠時將之官武昌閱二年寄

圖索

詩

卿雲麗曦曜紉縵荒隴同故人海上至邂逅欣相從舉
觴復援軫聊慰飢渴衷日月不恆處歡愛難久蹤明晨
隔川岳歧路多悲風成言信難渝令德無異崇楊柳覆
賓館星紀將云終眷言列坐侶寥廓猶萍蓬掩卷憶江
漢翹首歸飛鴻

宣武門外車中口號

薄笨驅風馬不肥年來漸覺宦遊非等閒卻羨城隅叟
斜日騎驢看翠微

補題尺五莊餞春冊子

道光二十年庚子孔繡山
同年憲彝偕秦澹如明經

細業邀諸同人餞春于
尺五莊予以事未至

燕郊春色自無邊又值東風試錦鞵畫意蒼茫悲往迹
故人寥落感中年笙歌未散金張宅煙水空迷韋杜天
楊柳蕭蕭花似雪荒莊遙指重淒然

牡丹初開同直諸君招集崇效寺

清梵迢遙向午微，暫因休沐款僧扉。
牡丹照檻香初透，垂柳依人絮自飛。
三月鶯花遊客晚，一城風雨送春歸。
金尊拌醉無塵境，不覺西山已夕暉。

聞寺中有無塵別境，四字明揚忠烈。

公書今不可見。

潘季玉常博

會璋

招同人集飲陶然亭

言稅簿書勞，驅馬遵廣陌。
孤亭翼城南，曠望心暫適。
夜雨被原皋，百草色含碧。
畿輔苦赤旱，何時見青麥。
及辰事游覽，嘯傲復何惜。
茲亭肇江翁，聿新失舊闕。
層屋輝離婁，構造地孔躋。
化爲徵逐場，冠蓋朝復夕。
婆娑庭樹

姿閱盡去賢迹白雲天際流映我尊前席以此晤千載
苦樂理可釋少壯不可居七尺匪金石痛飲謝故人視
今猶視昔

獨遊豐臺小憩古寺

尺五天南地春殘鳥不飛豐臺陳蹟在荒寺梵鐘稀風
色開晴陌花光戀曉暉十年盤馬客祇覺舊游非

遲哈菊人胡東谷不至

二君次
日南行

待君不至對孤尊未唱驪駒已愴魂暝色入林飛電過
樹頭風亂掩重門

送陳梁叔

克家

下第歸江南

燕市春闈策蹇遲送君不盡淚如絲大鵬空使蒙莊見

神駿何勞伯樂知勳業無情銷鬢髮名山有願理茅茨

南歸問訊雲間老文采飛騰信我師

謂松江姚春木丈椿

出右安門遊頤園泛舟里許

金南郊臺故址相近

綠煙城郭古郊臺猶有名園傍水開泛盡扁舟天欲暮

菰蒲夾岸雨風來

初夏作二首

玉河微漲水粼粼出水芙蓉葉未勻獨向橋邊成小立

瀛臺高處雨如塵

九陌風暄十丈埃廿年花事感豐臺
可憐芍藥多千笱
破曉濃香壓擔來

重九日酒樓小飲

重陽天氣未宜秋斜日邀人上酒樓
歌管聲聲何處院
不知曾否唱伊州

答索綽洛佩珩同年

寶壘

四首

長城飲馬後放棹灕陽潯但覺詩聲遠
渾忘歲序侵
越人笑章甫莊叟說蹄涔寂寞孤絃奏
天風海月心

著書久不就未敢薄虞卿與子眾中語徒令肝鬲傾戚
儀乘先哲輦悅恥虛名苞鳳翔千仞空羞下士聲

四十忽將至無聞安足豪頭顱悲老大慷慨事風騷長
劍摩空倚天山轉戰勞請纓吾有志早辦鷓鴣膏

江河在地上飲者昧其源到海眾流束插天長白尊滿
洲盛才彥之子更清溫欲采芙蓉贈相思未可言

送潘補之歸吳門

秋色滿燕市西風天已霜片帆下通路幾日到吳閭鴻
鴈開征路菰蘆訊舊莊同曹但相憶惆悵菊花黃

曹良甫御史

楸堅

招餞朱伯韓

琦

余以夜直未赴

作此寄懷

九月三日

秋風吹不定蕭瑟未成眠隔牖見新月虛庭暖夕煙故人黯將別尊酒更何年迢遞瀟湘路重闌思渺然

題家桐叔

為珪

行腳卷子

桐叔曾為湖南耒陽令

蕭然行腳者曾是讀書身跋涉何時已須眉自有真勞生皆逆旅乘勢卽經綸休問窮通理儒冠豈誤人

答潘濂舫

肇鏞

讀書三十年望道苦多憾餘事爲聲詩流光委鉛槧索

居來吾子移晷譚未厭贈句溫且摯愛我語非僂譬彼
空谷中孤花擷幽豔詩道若周行萬古無昏墊往者骨
已朽其文猶光爛厲精恃寸明寤寐貫鍼砭技悟庖丁
牛術神越女劍本根視沃膏至味譬醞釀緊余抱叢殘
嗜古未深饜風騷抗幽衷搖翰亦云僭當知古詩人非
徒競壇坫

題孔繡山

憲彝

四十小象

所居曰
韓齋

少年奇氣鬱嶙峋瞥眼俄驚四十春燕領功名淹骨相
馬頭歲月送征塵未容林谷成高隱但許文章到古人

我亦辨香韓吏部雲龍千載更相親

送黎樾喬御史

吉雲

假旋

臣職已云盡行歸湘水湄直聲傳諫草講席作經師秋色隨人遠鄉心去棹遲天涯鳧鴈侶皓首共襟期

君留別同

人詩昨者陳與米胡若鳧雁翔謂頌南伯韓兩君也

送黃矩卿侍郎歸養昆明二首

廿載官中朝有親天南陲寤寐滋眷戀中情孰能窺簪組信云美溫清曠厥司

君恩有時報親年胡可追方

今崇

孝治黼黻登雍熙遐齡自

天錫願陳烏鳥私趨庭有大義萬里焉敢辭旭日照帷
闥介壽揚金卮

秋飈肅平原寒日荒荒白驚濤接吳楚不辨阡與陌霜
露旣以繁鴻雁未安宅君行戒舟車蒿目歌于役還顧
春明門離腸結千百思心入幽渺不廢篇章積歲盡春
風暄唐梅花正坼南陔樂事多奉杖娛朝夕

題蔣笙陔閣學丈

立鏞

金貂踏雪遺照三首

西華門報曉鐘聲穩著貂裘冒雪行一賦飛花寒食句

九重當日識韓翃

公以嘉慶辛未科一甲一名及第

寶冊輝煌奉

紫宸歲時編進舊章循詞臣稽首

天顏喜萬戶千門氣盡春

迴翔蓬島歲華深鼓吹鏡歌奏雅音一卷流傳香案集

熙朝典故備詞林

公充起居注之職凡十餘年詣大典皆已徧歷道光八年回疆底定受俘

午門尤爲罕遇香案集公所著也

贈徐孟卿

江國論文數舉觴，壺園景物未全荒。
出門乍覺豪情減，話舊方驚去日長。
閒草滿庭知宦冷，嫁衣終歲爲誰忙。

令原忽痛秋風起，手把遺編淚幾行。

時出示令弟少峰遺詩

城南亭子小憩同潘濂舫

西山遙對暮亭涼，白雁聲中正有霜。
滿地蘆花秋色遠，放懷何處不濠梁。

寄王子壽

柏心

高城送別地，大木萬鴉聲。
聽罷還山曲，彌傷索處情。
中年辭闕早，何日著書成。
定有劉公幹，高歌酒共傾。

謂劉孝長

我廬

我廬雖不寬無事得俛仰皎月臨太空夜氣炯羣象造物無朕初機緘根所養扃戶且安坐天懷契遐想泊然方寸閒如遊軒義上

題孫次生

序培

東塢掃雪圖

負米思疇昔傷哉歲月遒江天莽風雪獨棹望林邱此地可廬隱披圖空淚流椎心憶吾母千里渺松楸

寄答徐懿父

子陵

長安初識君高亭暮春月風日宜壺尊並坐言未發私

表識其人神采何鬱勃分手各萍蓬纏繆到心骨所思
守我愚擇言不如訥貴心迹或疏苟合情易竭以此堅
始終遑慮中道蹶春花落郊原將辭承明謁黯然造我
廬云歸事耕垆發篋陳詩篇三復興超越健筆摩空游
矯若雲際鵠刻意爲詞人窮年自矻矻顧此抑末耳吾
道戒矜伐先聖有經訓千載昭若揭願言涉其大洞胸
觀溟渤立言該德功入道勾津筏敢陳一得義攻錯匪
倉卒庭雪披松筠朔氣來嶧砢相盟歲寒心羞言侶蛩
麀贈章久未報雲天悵飄忽

京國交遊者答人

京國交遊者終歲如流波但覩投縞盛不聞擊筑歌悲
風吹我心浩浩淩滹沱滹沱不可楫太行峙嵯峨太行
之上有盤谷泉甘土美居者今如何

家香士

道芬

取余泚漣集中詩句畫四幀見寄

險絕五谿路千山更萬山舊遊渾夢寐妙手出荆關幽
賞情何極長吟鬢易斑田盤如可訪寫我暮松閒

香士
作尉

三河于盤
山甚邈

詠舊衣

開篋見舊衣依稀鍼綫迹可憐憶母人腸斷淚猶溼

桓伊吹笛圖

中郎舊製柯亭笛絕技江東誰與敵岸上忽來桓野王
妙曲更有王郎識浩如流水千巖鳴急如哀雁啼青冥
萬籟息響華月明青谿激灩孤舟橫豫州拜命控邊壘
曾逐苻堅渡肥水據牀三弄旁無人銷盡胸中千塊磊
步鎧淒涼悲易輦中原何日休兵革不須更畫殿前箏
聞歌淚下謝安石

延年益壽瓦當文冊用翁覃谿先生元韻壽何子

貞編修

紹基

五十

我生嘉慶十六載嚴君曾得漢宮篆其文曰未陶質堅

西京規制稽禁扁

名禮生于嘉慶辛未是年大人得未字殘軼漢未央宮物也付名禮收藏

摩挲忽忽卅九年學業不入蘭臺選東洲居士風雅交

五十行年駒隙轉披奇不異蘇齋翁賦君是冊亦云腆

芝山獲瓦長安城魚門作詩稱大衍

乾隆壬寅翁先生年五十宋芝山明

經葆澗得此瓦於秦中爲贈先生拓文爽冊程魚門編修晉芳有和作

前翁後何如有神

吉語更符高堂戩益延壽觀證遷書

見子貞題詩

餘力徵文

語必典願屏俗嗜從君遊實事相期腴辭翦浮雲於我

何足論腐鼠嚇人差可免玉堂有暇承親歡伯歌季舞

重敦勉一官嗟我匏繫同惟頌滄波歲清宴

家兄巡撫粵東家大

人就養節廨

傳章三復意無窮奚啻冷風被餘善昨和陶公

止酒詩打門更乞君書卷

子近戒飲子貞夢中曾得寫成酒誥一百卷之句

敦夙好齋詩初編卷九終

男恩頤校字

敦夙好齋詩初編卷十

己酉正月至
庚戌三月

漢陽葉名澧翰源著

薇省集二

送彭于蕃

崧毓

旋雲南騰越廳同知任二首

八年宦南徼爲政眾稱神曲奏平蠻樂文傳諭蜀瀘祇
今兵革息更令犬羊馴異類皆蒼赤天心本至仁

譯外宣威德來王服正供安邊資靜鎮大度示包容別
思東西水歸程千萬峰一編風土記曼衍看魚龍

君著
有編

旬紀
事

敦夙好齋詩初編

卷十

過松筠菴

明楊忠愍故宅

自有椒山膽臨危語更雄
回天虛兩疏捧日鑒孤忠
石

墨精靈聚衣冠法物同
巍然祠宇在起敬逮兒童

公兩疏手

墓今已泐石菴內衣冠爲裔孫某所藏

清明日同人謁明茶陵李文正祠于畏吾村歸遊

極樂萬壽二寺

相公祠宇荒郊外
歲歲鄉人酌酒杯
垂柳連天迷故壘
寒鴉無語立蒼苔
千秋負展丹心在
七子爭盟謗口開
多少園亭異今昔
花時沈醉不須哀

草橋

出郭尋春過草橋
幾人攜榼任逍遙
黃鶯不到燕南路
孤負東風柳萬條

哀劉三椒雲

傳瑩

東鄰豔笙歌西鄰盛車馬
劉生持一編不自求知者
與我密邇居過從未云寡
疑義時相諮勢若瓴水瀉
經言闢奧突輿圖拓區夏
膏盡雞三號初陽已在瓦
矻矻一寸心朝暮鏤不舍
絕業俾汝成不在顧亭林江慎修下所惜
采桐具不得構堂厦一官去不就
言歸樹松檟別時疴

未痊纏綿對杯畢凶問來無端望遠淚盈把遺文如可
求他日爲君寫

題與竹居棄稿

武進湯荀業所作詩凡五十首乾隆五十一年從其尊人鳳山令緯

堂先生大奎死
林爽文之難

父子誓忠孝孤城臺海湄外援嗟不至從死復奚辭馬
革平生志鴻文劫火遺千秋存手澤淚灑羽林兒

謂冷
子雨

生都
尉

斷釵曲四首爲湯雨生都尉

貽汾

母夫人賦

二十八君門未諳尊章寵阿母親上頭頭上玉釵重

莽莽滇山雲迢迢揚州水持底報親恩貞節常不死

作釵

竹節形

釵完我心苦釵斷不苟全保此無瑕玉三十有九年

見原

詩

孤兒籍羽林篋中弄遺草珈笄雖云榮不如斷釵好

厲茶心丈

同勳

自邗上以新刻詩卷見寄

宦遊曾過羚羊峽返棹徒嗟倦鳥心垂老詩歌成激宕
故鄉雲物獨登臨藥闌花圃閒情寄瘴雨蠻烟舊夢尋
同學幾人今健在清時有味是山林

遊萬壽寺

城西舊蘭若好景入春妍
露重花垂地雲深樹拂天
曲廊迎落日疊石引疏泉
昨夜西山雨涼風麥滿阡

贈孔繡山舍人

燕臺逢孔五才調素知名趨直
晨聯轡哦詩夜擁檠
壺觴乖舊夢風雨倦孤征
蕭瑟城南柳春歸畫不成

繡山有尺

五莊儀
春冊子

振觸

振觸閒愁罷舉杯
儒生懷抱幾時開
黃塵浩浩終無盡

青鬢遙遙不復回，上國笙歌忘晝永。故鄉波浪畏書來，窮年飽食神倉粟。豈有潛夫著論才。

書感

桃花浪後南風作，黃鵠磯高不可留。一紙家書傳涕淚，千村屋宇歎沈浮。江濤夜怒飛符急，野哭聲悽代吏愁。往日監門陳繪事，祇今牖戶孰綢繆。

寄王子壽

王郎別我今三載，誰與狂歌慰寂寥。他日晴川歸計遂，扁舟相訪莫辭遙。

德勝門外訪薊邱

斜陽欲落遠煙浮
過客停車問古邱
垂柳依然傍道清
西風添作薊門秋

夜展郭羽可翁畫竹寄憶

白髮還家理釣舟
城南壺榼記前遊
思君不見見君畫
飛夢今宵下吉州

題卞領臣刑部

寶第

灑江圖卷

君尊人竹辰丈曾分巡廣西右江道

瀟湘南去蒼梧路
萬古青山不知數
灘水鬪石麻蘭高
柳侯當日留奇句
黃蕉丹荔幾經霜
客游回首天蒼涼

風煙歷歷列圖障分水亭邊舊夢長

題畫

聞有隱君子栖遲於此閒檐端數峰靜門外釣舟閒
白霜初下林昏鳥未還危橋尋汝者扶杖未知孱

送李萊峰

士芸

文章若行師變化具心膽壁壘屹旆旌萬夫不可撼
大智養以沈至決歸于敢嗟我與夫子性命委鉛槧暫別
安足悲相聚味彌醇勉哉游子身往途風沙晻

喜溫伊初至

章門不相見客思復如何十載燕臺月重來發浩歌高
文歸正始舊侶問山河悵望千秋事休言鬢已皤

西直門行

戛戛西直門遙遙車下輪荒雞未號門卒喧車中之人
年復年車輪擊石石骨裂舊者白髮新朱顏繁星煜煜
耿長道馬耳追風天不曉車隆隆塵浩浩

除夕簡溫伊初

朔風無際歲華催莽莽華陽舊日臺歌嘯猶存千載志
馳驅若爲故人來著書盈帙憐殘鬢倦客多情對濁杯

滄海不波嘉穀茂極天春色到蓬萊

君有海宴嘉禾二
頌紀今年粵東事

除夕作

豪氣猶如昨高歌復此辰問年已強仕低首作詞人
鏗火知殘夜壺觴念老親一經兒可授風雅本天真

兒子
恩頤

時授
毛詩

雪後郊外曉望

馬首天初曉寒風少陌塵西山橫咫尺積雪照城闔
疏柳春光覺飛鴉野意馴吾心渺林谷猿鶴定相親

題潘補之石壁探幽冊子二首

昔聞王

阮亭

與宋

牧仲

拏棹此探奇風雅何人繼蒼山太古

姿遠煙湧林屋大木接龍嶠俛仰一長嘯天風颯颯吹

潘子抱遐尙攀緣不厭深疏襟來勝侶秋意動微吟我

有看梅癖相思屢夢尋何年築茅屋遲月共橫琴

余有鄧尉

夢遊
圖卷

園花未放

閉門不飲酒孤負壯盛時眾鳥寂無語春光何太遲東
風雨復雪冉冉如游絲獨立悟元化萬象皆我師

車中感賦

白日去難返青山空笑人年華違夙好車馬奪閒身仰
眄投林鳥遐思躍海鱗煌煌京洛地自古歎緇塵

贈王孝鳳兵部

家璧

姓名託文苑所居未爲尊世降作愈眾紙墨銷清真自
從訓詁衰昌黎起扶輪厥功在孟氏衛道何諄諄津逮
迄有宋濂洛周行遵爲文貴自立匪曰華吾身上以輔
治化下以蘇生民養我剛直氣沒世不緇磷渟峙象川
嶽其他難與倫君懷鑑羣有望古羞因循願崇麗澤義
大道無越秦

百事

百事訖無就虛名徒自悲浮雲爾何物白日久相期放
意希魚鳥忘機對奕碁翛然庭戶際聊復誦騷詞

贈左景喬舍人

宗植

走馬燕山下春風楊柳天相逢憑夙契呼舊轉潛然

謂湯

海斗酒憶鄉里狂歌非少年斯文關氣運夜看列星懸

秋君精於天文之學

懷姚梅伯

寂寂四明客著書思獨深古人期爾到茲事復誰任楊

柳幾回綠風沙千里心桑乾流不息別後感難禁

遊龍樹寺登看山樓弔馬湘帆御史

沅 昨年借
御史遊此

獨遊尋古寺春色滿樓中客散山容暮廊虛柳自風
永懷江國侶回首酒壺空惆悵不能去憑闌送塞鴻

題宗滌甫前輩已酉詩冊後

空山一片雲常懷沛雨想隨風騰九天俯視憫塵埃憶
昔與君遇高咏時俯仰廿年若須臾索居心增快躬耕
君未能寸管申眾枉如披監門圖環列鵠鳩象象魏在
江湖秉心實忠讜峩峩山峰私衷久向往君家傍其

間風流溯疇曩興起今何人獨立視天壤大樂諧鈞韶
穆然息凡響

直廬風夜感賦

是日清明

老大滋余愧劬勞念母情崇邱縣歲月遠道負清明匏
繫一官拙鷄鳴千感盈庭柯風不止敲枕夢難成

夢兩姊

大姊適黃二姊
適汪皆早逝

風雨一鐙共分箋筆不停歡娛追齟齬夢寐傍家庭骨
肉難終保歌啼付杳冥天涯一悵望墓草幾回青

大風車中口號

車中兀坐等孤蓬回首江湖客夢中耳畔風沙疑海沸
一聲何處叫歸鴻

退直

退直歸來晷已遷玉河橋上晚晴天微波綠蘸春城雨
垂柳青搖酒舍煙薄有文章酬夙願但將車馬送流年
眼前景物堪吟眺翻羨平沙一鷺拳

寄伯兄

休說書生翰墨場談兵欲邁羽林郎瘴氛毒霧清重譯
軍府番畧肅萬航憶昨酬庸叨異數全家流涕感

先皇居官努力完吾事姓字何需史冊彰

溫伊初晤談卽贈

西山終古森屏障南客狂歌自激昂
放眼周秦餘簡冊側身天地閱風霜
佳人垂老憎眉黛駿馬長嘶戀戰場
無事更尋莊叟旨吾生適意卽濠梁

得王子壽去年書

客有螺州詠飄然片艇歸著書能自任
色養喜無違蘿薜非高尙雲霞契靜機
經年消息達誰識夢因依

寄孔宥函

萬族嬪來復爾我常睽離生無松喬術妄冀金石姿
暉庭中日不異言笑時塵飈速老醜攬鏡顏已非翱翔
慕四海何如山梁棲山梁契飲啄遐舉將焉歸滔滔天
壤間撫我孤桐絲物生有本性在遠心相知清風鑒幽
曲千春以爲期

爲溫伊初賦登雲山房詩

南望七十里君家雲氣中名山成獨往茅屋倚空濛叢
木百年長瑤琴幾輩同潮陽鄰咫尺更憶鐵耕翁

人不得黃

香鐵翁消息鐵耕樓香鐵所居也

敦夙好齋詩初編

卷十

十

過廢宅

春色照衢巷花枝入遠樓昔時承笑靨瞥眼換銀鈎日
落寒煙積庭荒野雀游何如瓦盆底猶得子孫謀

潘先生詩集刻竣贈吳稼軒

落落淮東叟寥寥大雅音畢生鬱俯仰後死痛人琴未
了吾儕事彌傷不朽心勞君奏鉛槧相對涕難禁

贈楊性農

奕珍

二首

大道衷一是趨者徒歧分勞勞歧路閒百齡等無聞索
處不知苦舛陋奚足云萬慮返遙夜方寸何瀟瀟念我

直諒友展轉雞鳴晨

清門蘊和氣歲遠芝草長靈根不可絕覘脈思所養入
門詔童冠常作鄒魯想出門樂友生和平萃吾黨一真
在胸臆文字壽天壤

時以所作瑞芝室記見示

爲林薌谿

昌箕

題母夫人一鐙課讀卷子

弧矢走四方夢寐戀鄉土追思投經初一鐙炯茅宇颯
颯霜風吹切切響機杼霜風砭肌骨機斷母心苦願兒
事儒冠毋爲逐商賈願兒崇令名匪曰榮珪組巍巍孔
氏門萬載肅堂廡趣兒俎豆旁兒今有規矩

具詳家傳兒名

上賢書功業行當樹兒抱禮堂學文字粲可觀不聞機杼聲霜風慘行旅啞啞樹間烏夜夜淚如雨一鐙在圖畫少壯異今古何日報母恩茹哀對三釜

上巳

上巳今朝是蕭寥實好懷三春滯花事無日不風霾酒客寰中少山光天外佳久疏游禊約援軫掩高齋

題畫答孔宥函

大古一拳石空山連蘂花石瘦自雨雲花媚不傾斜升之虛堂中故人非幽遐

贈徐懿父

別離三載夢俛仰百年身相對忘人海放歌驚比鄰世
情等喧寂天意愛酸辛良趾占无咎何鄉養谷神

君病足時

讀老子

贈黃子幹

生事寄歌歛舟車十載中流光驚老大詩卷振家風倦
鳥將焉適春花感不窮睽懷尊酒會傍郭一亭空

謂江亭舊

遊

營卒任某戊子順天秋試爲余供役今復遇於號

舍因贈以詩

皇都風日藹蓬瀛又向春官逐隊行二十三年鐙火影
與君相對話平生

三月十五夜號舍作

重闕扃鎖鑰令嚴如三軍磊磊八方士射策希風雲繚
垣肅萬舍鼓角連朝曛仰瞻路何階羔雁惟空文蕩蕩
明月輝夜靜無纖氛下土恣容與天樂遙相聞夙昔伏
蓬華抗懷殊不羣何能屏浮念百歲崇清芬

酬徐懿父三月十四夜號舍對月見懷

一身備眾役所求母乃勞故人官相念咫尺關河遙都
堂儼霄漢夜氣澄煩囂月魄亦已滿流光呈麗譙爾我
共此月在濁終不淆擁裘象夔屈清夢游消搖了事
之去奚翅樊籠逃願假黃鵠翼休慕焦明巢

答李萊峰

比屋列經史相依燈火光君能崇古義我尙昧津梁馬
老不知倦花飛空爾忙求賢頻下

詔何以答吾

皇

贈孫芝房編修

鼎臣

放眼文章若有神，欲扶大雅掃荆榛。
春秋佳日幾遊跡，雲樹天涯憶故人。
謂王子壽歌嘯無端成爛漫，肝腸終古鬱輪囷。
風騷自是吾儕事，沅芷湘蘭悵望頻。

暮春沅園寓直

密陰覆屋坐對我，懷靜悠然時鳥鳴。
青陽眷餘景，簿書既不勞。虛窗味彌永，遺編聊復陳。
返觀要已領，矻矻千載心。依依寸晷秉，未曉車馬來。
夜氣囂中耿，開戶星漸稀。微茫辨遙嶺。

東園感舊

種樹曾幾時婆娑一林擁殘扉曠履綦青山尙遙聳覽
古阻且長力弱心彌勇舉首雙丸奔益我修名恐昔遊
二三子歌聲罷荒穰嘔心饜所好臨化不旋踵積情眎
物遷撫已戴天寵萬感無一言飄風望瀕洞

贈徐懿父二首

徐生貌何癯強欲偕計吏悠悠道旁人望之輒引避昔
晤京國門迴風忽分轡歸來囊橐羞無聊賣文字妻孥
幸獲飽時花富生意蛟龍羨汝棲羣游挾浪至浩歌全

其身身外且姑置

東市七寶車西家連錢鞵飛塵喧暮朝不入幽客夢
閉門抱冰雪寥寥與古共我心無它營孤絃自撫弄逍遙
千仞間鴉鷄謝嘲哢名理寓眾紛緒言偶一中慎毋改
孤絃天海絕塵霧

萬壽寺

西郭問名利東風啼乳鳩深庭未花落佳日幾人遊
曠昔中涓地淒涼斷碣留蒼松響蕭械小坐當林邱

風夜

大塊有噫氣鬱極作風籟一室爲虛舟洞見八荒外妍
華慨庭木且暮委浮塏風止籟亦靜根柯固未害斯人
立兩間茫茫復焉賴神理一以滅倏與糠垢會古之固
窮人琴歌緬索帶

送人歸里

送君還故里芳草暮春天我亦漢皋住別來風景遷牢
益生業聚財賦度支懸聞道波濤後依然盛綺筵

人海

人海容身倦欲逃車輪馬足強云豪愁心冉冉天涯草

春事匆匆露井桃善藥舊憐泔泔泔新聲羞度鬱輪袍
兒時鐙火今猶炯執業無成首重搔

書感

緇衣不澣京華土華髮猶餘翰墨情三月燕郊花未落
廿年矮屋月仍明及身浮譽難終遣過眼名場總不驚
猿鶴蟲沙成底事悠悠詎可概平生

待月有感

東海一輪月飛來席上琴况茲良夜永不盡暮天心終
世幾師友所期成古今徘徊衾枕地清夢旁山林

敦夙好齋詩初編卷十一

庚戌四月
至十二月

漢陽葉名澧翰源著

薇省集三

憶舊游五首

錄三

少日曾爲汗漫游短衣匹馬倚吳鉤
西風吹上居庸嶺橫覽燕雲十六州

彷彿雷聲雜雨聲朗州西上萬灘行
停橈偶訪仙人屋

願與村農話太平

辰沅道中絕壁間所謂仙人屋者明末人避亂居之

君山山下不能泊一葉狂風渡洞庭
坐失千年名勝地

竟無詩句報湘靈

訪董嘯菴

澂鏡

戴存莊

鈞衡

有贈

皖江來二客
樾戶愛幽閒
世守經生業
人方逆旅間
淨名無滿意
白日促離顏
一詠滄浪句
清風不可攀

下第後答徐懿父

莫話升沈事
生涯默自知
問年撫明鏡
所愧不蛾眉
磨涅期吾黨
文章負盛時
男兒有涕淚
歧路又焉悲

短歌答魯通父

一同

我交于君十五載
碌碌無成容鬢改
舉頭不見燕昭臺

舊日歡游幾人在黃鸝得意鳴春風繞城亭榭花枝紅
何如攜我素心侶席地對聽慈仁松

慈仁寺在城西

七寶之車

千金馬蓋逐少年事游冶悲歌四望遭逢寡
嗣皇側席求俊髦誰起江東徒步者

原作

山陽

魯一同

通甫

濟濟豈弟人使我肝膽盡結交十五年表裏一端謹
哲兄撫南服萬里靖鼉鼉山嶽蕩洪濤顧步得深穩
起家列茅土君也閉扃櫪朝衫積垢污新詩日清省
爾來風會殊羣賢驟鑣軫文章篤師訓忠愛已根本

紅芳晚霏霏別酒春泯泯
違離那足道繩墨失牽引
君若登台垣風期展閱遠

送戴存莊歸桐城

涕洟不敢下爾有高堂親
離腸輪干轉矧我羈旅人人
事偶屯蹇身外皆浮塵百年
重戴履所事休因循故鄉
一老叟方楨之
翁東樹高卧山中雲爾歸詎
孤陋覃思風雨勤
有聞願相告皓首崇先民

溫伊初魯通父吳稼軒徐懿父
諸君將行過余尊
酒言別二絕句

故人明日各江海憐我孤吟燕市中回首離亭風雨暗
夢魂猶許酒邊同

單車南去走風波人事驚心萬感多欲借黃河傾涕淚
不關門外有驪歌

贈王惜菴

相

王翁舊是鴛湖長文獻百年如指掌浮家卻傍鍾吾城
海日江湖殷夢想鍾吾城中萬卷樓南面坐擁何所求
開窗俯接黃河水盪胸可以銷煩憂今年訪古華陽館
百壺倒盡春風遠宣南坊底走敝車天涯寥落相逢晚

縱橫上下談古今興酣不知白日短斯立隨身卷軸多
鄴侯插架縹緗滿君不見中吳汲古閣東越千頃堂故
事盛推毛與黃文采風流今渺茫范家天一始前代數
百餘載歸靈光後來誰與相頡頏爲翁賦長歌願翁壽
無已眼中有子子有孫一經傳付少倫比身隨野老游
唐虞白髮蒼顏勝圍綺浮塵跼踖難久居涼秋誓欲還
鄉閭草堂何日停雙櫂徧讀平生未見書

過韋竹坪兵部

坦

故宅

淮州痛失潘夫子韋郎後起詩才美胸羅萬卷口不言

退食焚香把經史君詩澹泊多五言左司以上窮根源
太羹元酒含至味澄汰無復餘滓存王程幾度馳驅勞
不如閉戶親風騷一官嘆子未稱意欲歸不得中心切
妻孥遠隔天南路孤櫬淒涼獨歸去平生遺草問何人
驅馬門前不忍駐

懷魯通父吳稼軒

失意偶然耳神傷此鬢毛關河雙淚遠襪被兩人勞
術悲牢落端居積鬱陶升沈何足問託命且風騷

讀姚梅伯辛丑以後詩卷感賦

傳烽南望甬東天千里驚魂速去鞭
詩句激昂留信史
酒尊潦倒度中年
蒹葭秋水廬安在花月春江夢惘然
不見黃墟舊遊侶
一編相對淚如泉
卷中哭張亭父湯海秋諸詩均極沈痛

贈楊季涵庶常

羹珍

楊君昨日登詞曹
眾中一鶚驚翔翮
吾黨聞之竊攬涕
快意觀此風雲遭
長安花時屢相待
公車幾度霜毛改
今年嘯傲黃金臺
兀兀千觴消魄磊
南宮下第四千人
齊咽離聲散湖海
就中數子我所親
手握龍泉吐朝采

溫翁

伊初

老作諸侯客魯

通徐父

歸卧蓬蒿宅

關山夜指

征途長落月殘星照顏色惟君姓字上朝籍低首年華

將半百諸君磊落不我遺倡和何異墳與篋升沈離合

未足道皓首勿抱修名悲修名不立良可恥狂歌相對

酬知已儲材卿相致身始亨衢高躡母泥滓努力他年

報

天子

夜雨

急雨傾檐砌清風滌鬱蒸孤吟掩高閣永夜對殘鐙寥

敦夙好齋詩初編

卷十一

五

落懷人夢淒涼入定僧忽思江國好何日就魚菱

唐元次山

詩將家
就魚菱

雨止

雨止得新霽清陰散古槐薄雲收靜夜涼月下空階巢
暗鳥聲寂石敲苔意佳蕭蕭蠶語急竟夕動秋懷

孔禱華

憲恭

孫怡菴

謀

招游龍樹寺

破陀迴佛寺識路有青驄雲木納深秀菰蒲交遠風開
軒臨古堞載酒當孤筵名輩題詩在沈吟夕照中

壁上
有鮑

覺生丈桂
星詩刻

口占

書堂積雨困經旬
手爇名香展几茵
燈影暗依塵壁畫
蟲聲寒似苦吟人

尺五莊

荷花嬌未吐
當午遞微馨
水氣澄餘霽
風光稱小亭
沙明浴鵝鷺
草煥掠蜻蜓
不聽采菱曲
鄉心悵遠汀

偶作

微雨歇
深林颯然
初秋候
愛茲返照妍
苔石轉多秀
樹杪一蟬吟
涼颯度清晝
適情撫我生
何必瑤琴奏

敦夙好齋詩初編

卷十一

六

津門行

紀今年五月事

津門居民數十萬躍馬鳴弦思一戰夷艘聞之遠遁逃
海波頃刻登清旻旌旂獵獵軍門開大府傳檄聲如雷
廟堂有策能持勝衢巷歡呼

天子聖

西直門外小憩

池漚重圍外停車卓午天平疇蒸宿麥官道送鳴蟬山
遠雲深護村幽鳥自還暫違城市地一勺得清泉

夢徐懿父

與君杯酒復相親
屈指燕關別幾旬
庭樹雞鳴天欲曙
夢回不見眼中人

日夕

日夕平臯上悠然
風滿襟獨遊稀
伴侶客思轉蕭森
密雨田家靜殘鐘
野寺深晚涼堪徙倚
隔水送歸禽

安心

安心我欲百無營
世事飛騰等重輕
詞客聲華矜腐鼠
豪家風味飽侯鯖
琴尊跌宕常爲伴
林谷迢遙計未成
身外消除惟默坐
夜闌不礙月華明

過某氏園

主人去後園亭在翠管銀鐙付渺茫斜照沈沈車馬少
疏籬轉轉芰荷香祇餘金谷秋風嘆漫比平泉舊日莊
若向錦官城畔過花卿遺曲更悲涼

題故定海縣知縣姚君遺墨二首

并序

君名懷祥福建侯官人道光二十年倭夷犯定海以書
招降不答挺身登夷船曉以大義無喻者歸與總兵張
朝發飛書告急提督某不應總兵中礮傷劇死之君率
眾守陣俄而城陷赴北門外池中死後建君祠于吳山

其友謝蘭生得手書七十八字潢治藏之祠中並爲徵
詩

絕艦驚烽火孤城盼外援傷心一池水莫控九幽冤慘
澹萇宏血蒼涼精衛魂長留七十字風義故交敦

總戎能共死大帥戀微生竟助鯨鯢虐難逃日月明名

山尊廟祀片語著忠誠幸際滄波靖邦人淚尙傾

君殉難拒

夷事吾友姚梅伯紀以長歌並言五日前課書院以爲臣不易命題平時與邑中諸生談經莫不悅服

歸文休畫竹

名昌世明萬歷間諸生和陶詩爲世所稱乙酉卒年七十一此幀題丁丑

菊月蓋崇

禎十年也

震川好孫子壯歲入山林栗里可同調蒼筤多苦心伶
倫何日遇霜雪那能侵素壁生煙色滄桑感獨深

憚南田臨柯丹邱枯槎叢篠

自題壬戌七月南田壽平

不見丹邱生何處甌香館竹木抱晴虛翛然空山遠欲
往從之游吁嗟我生晚

酬孫琴西同年

衣言

壬寅冬見贈

湘山灑水歸來後意外逢君話寂寥猛憶詩篇成夢寐
狂思游棹狎風潮海東月上浮杯遠薊北春殘策馬驕
今日故人殊落落相看旅鬢漸蕭蕭

河南輝縣新修明彭餓夫墓徵詩

并序

餓夫名之燦字了凡蠡縣人甲申鼎革遊蘇門依孫徵君夏峰先生攜漢壽亭侯書一冊以示意徵君勸以歸老墳墓不往竟坐死于嘯臺之旁徵君義之爲表其墓時順治戊戌也余友宗戶部滌甫曰夏峰守道寒石永貞餓夫獨死于戊戌其必有以矣

雪聲堂上松柏悲東皋亭榭將焉依江山龍虎王氣歇
隻身且向中原歸蘇門之山高無極藜藿心傷不可食
請君試發囊中書俯首先賢多愧色朝哭嘯臺西暮哭

嘯臺東片石大書視年歲知我心者孫夏峰

雨後夜坐

夜氣澄羣翳徘徊戶正扃露涼驚宿鳥雨止散流螢曲
徑苔痕暗高軒燭影青欲招明月至竟夕坐風櫺

立秋前三夕

重門掩深夜星氣垂中庭好月不可致寸衷涵窈冥元
化激微物四壁蟲響并西風先去聲秋來獨坐難爲聽

書懷二首

帝里驚心歲月催過門車轂轉輕雷階前碧草經秋長

屋角青山卷幔來，寂寞心情依古井。
余宅中井子午二時甘冽名子午泉
消除豪氣卻金罍，年華四十難言老。暮景飛騰句漫裁，
半生懷抱詎人憐。退直歸來守一甔，骨肉相思嗟遠道。
向禽招我嘆經年，儒冠突兀羈勦業。瑤軫蒼茫隔海天，
莫問薦雄文似者才。疏未敢獻甘泉。

曉起

叢露延朝涼，胡蝶墮寒草。齋居若空山，忽驚秋氣早。
扶疏庭木枝，尙未就衰槁。驚蟬偶一聞，疏響靜逾好。
曠然我無營，養幽在襟抱。

送人

極目鳥飛外，離亭人已遐。
獨騎征馬去，不盡是風沙。
小別初秋雨，相思半嶺霞。
宵來擁餘醉，有夢到京華。

右安門外酒舍

野曠天將暝，孤亭豁遠眸。
葦花風不斷，客思亂清秋。
惜少同心侶，還爲載酒游。
廿年題壁句，零落渺難求。

題孔經之

憲庚

顧祠圖冊

每歲顧亭林先生生日同人設祀祠中今年五

月二十八日至者十八人經之與焉祠在慈仁寺側先生舊居地也

徵君昔遠適，曾止燕臺下。
寸衷準百代，著書自陶寫。
舊

居拓祠宇雲物尙蕭灑自從經營暨歲時羅尊罍冉冉
雙丸中故交日以寡並坐得孔君績事託風雅因悲三
晉客墓草行堪把謂張石州穆曾編顧先生年譜暉暉竹光妍浩浩松
籟瀉世尊默無言西山時遙野

松筠菴雨後送王惜菴歸宿遷

燕南十日雨闌暑送郊原征客先鴻雁秋風望故園旗
亭疏柳溼古寺暮禽喧車馬遲明發相思夢不謾

秋初訪潘補之涵秋閣小坐

訪友城南路閒門傍夕陽同曹值休澣高閣對秋光車

馬羣塵靜菰蒲野興長
儵然共清詠此地卽滄浪

補之家于

吳吳中有滄浪亭

郊望

城郭積愁霖今日快新霽
縱目無遠近微涼納衣袂
招提面遙野日高門尙閉
松柏挺茂陰盤盤歷年歲
秋雲展遙空適與我心會
悠然抱孤情所希不在外

雨夜題壁

衢巷過從少宵深愛掩扉
暗蟲聞獨坐宿雨遲朝暉
懷古百年短悲歌塵夢非
名山終不負一笑謝輕肥

去日

去日嗟難及，憂來自拊膺。
風塵鬱孤軫，世路一春冰。
獨處懷軒燧，冥心絕愛憎。
男兒思努力，不畏景飛騰。

題孔經之明湖泛舟卷子

鵲華秀出如芙蓉，迴光倒挂明湖中。
不見齊都舊游客，夢想白鹿驂蒼龍。
霜氣橫空天在水，蘆荻蕭蕭聲不止。
扁舟俊侶恣倘佯，風流不讓前賢美。

送陳念庭

金城

歸惠安

經師著閩越，宦隱且京華。
一夕秋風起，征帆去路賒。
高

名猶不達吾道付長嗟莫共豸冠客行蹤戀釣槎

兼憶
頌南

給
諫

得董嘯菴同年書

相見復相別儻個羈旅間與君皆老大結念一名山路

遠夢魂苦秋高鴻雁還印須真得友詩句滿河關

來書
言途

中與戴存莊

倡酬甚富

答陳九香

卑官倦奔走六十尙夷門守道不能枉名山好細論殘
鐘懷昔別寒雨判孤尊過眼嗟生事飄零舊墨存

壬寅
冬夜

宿明港驛有詩留

別來青猶稱及之

姚秋士

斌桐

遺詩一卷潘季玉將付梓人感賦

秋士

籍漢軍其先世桐城人也

君家皖公下終歲抱歸心不盡唐衢淚

集中有詠唐衢詩

空爲

莊舄吟應官從性拙結屋比山深孟六遺文在千秋託

賞音

秋日過龍泉寺

廿載問蹤跡常爲蕭寺游野風吹短鬢寒雨又深秋倦
眼宜山翠詩心澹渚鷗幽尋吾自愜車馬幾時休

敦夙好齋詩初編

卷十一

三

夏羽谷畫竹

名暈明太常寺卿景之後名重吳下多于歌樓酒舫間爲之

太常名字重西涼露葉風枝老更狂今日文孫宗派在

畫樓著意寫瀟湘

廢寺

鐘磬當年演大乘西風樓閣感難勝空堂寂寞迷人代
寶相莊嚴閱廢興山色繞城將作雨秋花滿院不逢僧
那堪更說汾陽事豔舞清歌最上層

重陽前二日得張篁村畫因題一絕

名宗蒼一字墨岑吳人乾

隆年間以畫受知此幀自題有傲煞蘇州韋刺史高齋無事且題詩之句

冷官門似野人家，瘦石幽籬一帶斜。何似卜居章刺史。

高情終日對寒花。

見章詩

南西門外詠柳

枯柳西風九月天，鴉聲點點下寒煙。豐宜門外遊人少，不見飛花打釣船。

題長沙毛青垣翁

國翰

麋園遺詩後

結廬老向麋峰下，山水中藏太古天。極目世途多梗澀，畢生懷抱賸詩傳。不圖正始存餘響，獨抱遺經待後賢。歎息神交空廿載，蒼茫無路問黃泉。

和作

善化 孫鼎臣 芝房

昔逢毛叟臨沅日永夜論詩酒細傾老去嘔心緣一
字客中衰鬢颯千莖聲名慘淡憐身後詞翰飄零付
友生獨有舍人真識曲九原應爲涕縱橫

九月十四日夜直偶成

月落高槐霜氣浮夜來烏鵲繞枝愁八年襖被中書省
飽聽東華報曉籌

楊文驄畫蘭竹二絕句

自題崇禎甲申冬戲作

香光弟子筆通神尺幅題名歲甲申蹤跡未聞湘水上

欲將清怨比騷人

斜倚疏篁婀娜姿和烟和雨共迷離南朝諸客風流甚

更問青溪老畫師

馬士英

展重陽日戴雲帆

綱孫

邵蕙西

懿辰

汪醕卿

廷儒

邊袖石

浴禮

周苻農

壽昌

孫芝房

鼎臣

聚譚虎房

橋西寓邸

人海蒼茫寄一塵論詩讀畫憺周旋今朝風雨酬重九

我輩壺尊遣盛年薄宦但求方朔米餘音空歎伯牙絃

時從芝房前輩借鄧湘皋丈顯鶴沅湘耆舊集江醕卿以所刻廣陵思古編見貽

何時服領銷

兵甲極目南雲忽悵然

題宋丞相陸忠烈公秀夫遺書

鹽城王氏夢熊陶氏性堅編輯

波浪崖門島松楸大陸村

鹽城縣大陸村公衣冠葬處

虞淵扶墜日

精衛訴哀魂執友收書早

公有日記言海上事授青原鄧中甫見宋遺民龔開所作

傳 朝衣進講尊淮東徵往事仰止一編存

敦夙好齋詩初編卷十一終

男恩頤校字

敦夙好齋詩初編卷十二

咸豐辛亥
至癸丑

漢陽葉名禮翰源著

薇省集四

寄張州父

君爲句容教
諭十八年矣

分手十餘載
途長魂夢親
蓬廬供俛仰
煙水足清真
薄俸饒篇籍
儒官託隱淪
知君善幽獨
不負歲寒身

題甘孝子傳後

孝子名選年字鶴籌道光六年
旌表入祠甘星如炳之尊人

也胡竹村戶部
培輩爲作家傳

剗股非庸行
傷哉孝子心
回天緣至性
行路爲悲吟
漿

粟仁聲在馨香薄俗欽楮山有茅屋我更涕難禁

楮山爲先

曾祖葬處大父嘗廬墓三年土人猶能道遺事焉

訪戴雲帆賦贈

時官御史將假歸昆明

應接罕車馬年來恒閉關苦吟中夜月歸夢五華山列
屋書籤滿依林鳥雀閒空餘經世意激宕酒杯間

四月三日雨後慈仁寺願祠展禊同集者凡十有
九人

青山雨後遶城斜主客風流感歲華野意蒼茫聊躡履
浮生蹤跡付搏沙冠裳不負文章藪俎豆猶存著錄家

潘季玉捐置祭器孔繡山相禮並著祭儀圖說

酌罷菰中老居士

亭林先生著有菰中隨筆

一觴相向聽歸雅

天禧昌運宮松

在西直門外二里許廣源闢南明武宗爲內侍張永建道院于此今

就地矣有白皮松六株當是遼金以前物人鮮知之者

翛然五百年前物
颯颯濤聲天半吹
元帝精靈有時降
白龍天矯豈無知
雲霄得路垂陰礙
冰雪盤根歷劫危
欲問武皇當日事
夕陽蕭瑟映穹碑

黃樹齋師招登陶然亭出示道光丙申展禊卷子

感成二律

敦夙好齋詩初編

卷十二

二

江氏好亭子登臨不計年舊題沒苔蘚朋輩閒山川興
廢殘僧事鶯花勝地偏禊遊圖畫裏回首意茫然

菰蒲青不斷拍馬當乘舟塵土淹儒服琴尊賸倡酬蠻
天方轉戰

廊廟孰分憂嘯傲吾儕事憑軒起暮愁

黃樹齋師舟中課子圖

滔滔人事易遷流

先帝恩深恨未酬霄漢當年有封事江湖滿地倚孤舟
傳家卻喜殘編在垂老難爲負郭謀婚嫁何時願粗畢

從公五嶽恣遨遊

遊龍樹寺

城南留得前朝寺樓閣憑臨野色高
閱世誰如龍爪舊尋幽那惜馬蹄勞
殘僧職業餘文字病客心情厭濁醪
不見當年文社侶荒原日落首頻搔

二十年前此地詩文社最盛

甘祺人所藏宋天禧江甯府都酒務印其弟石安
同年以拓本裝冊索詩

篆文斑剝土花蟠少府遺文不忍看
一自宏羊籌國計那聞溱氏復周官
故宮轉瞬銅駝冷浩劫傷心白雁寒

付與詞流勤弔古摩挲猶可證叢殘

篆文監江甯府都酒務記凡八字印

昔有天禧二年八月少府監鑄十字行書

陳頌南蘇賡堂兩君應

詔先後來都晤贈

同是

先朝獻納臣數千餘里

詔書頻天邊此日還相見窮後爲文更有神未許名山
返初服願將直道副

昌辰更懷八桂林中客嘯詠何由一室親

謂朱伯韓

壬子四月九日雨後同魯通父戴存莊小集尺五

莊四絕句

錄二

樹陰濃覆小亭低清淺菰蒲葉未齊
試向尊前歌水調不知門外有輪蹄

故人回首慟黃墟

謂湯海秋張亨父諸君

我輩狂歌歲月徂一片

鄉心拋不得夜來飛夢到江湖

題符南樵

葆森

彭蠡湖雨望卷子

日落宮亭湖名山迎客艫雲錦九疊張
忽憶謫仙語頭白人
不歸曠代心相許竦身明鏡中
青天送風雨

卽事

壬子四月
十六日作

上都好景足婆娑
牙管玲瓏續舊歌
莫遣林花易憔悴
春明門外雨風多

送戴存莊

亭堠在我夢不畏途路長
與君復相別執手增悽惶
生年會有盡晷短心孔傷
中夜恒不寐憂來何無方
二儀一俯仰道乃司其常
人事幸無忤但願眠食康
悠悠客心痺蕭蕭征馬鳴
強言會有時甯復淚縱橫
收淚傍城闕目極塵沙揚

題汪仲穆詩卷

耆舊毘陵盛

謂乾隆嘉慶間
洪趙楊孫諸君

于今復幾人觀河知本派

絕迹見神麟烽火灘江遠鶯花

帝里春匣中孤劍在拂拭莫逡巡

十二月十六夜醉後作

時聞武昌
漢陽失守

戒飲心情最可哀今朝忽復事尊鼻江鄉回首傷心甚

黃鶴樓高一劫灰

都門夜雨

夜雨不得止聲聲寒雁飛迢遙故鄉路問我幾時歸

敦夙好齋詩初編

卷十二

五

閒門

閒門少車馬衰草傍階生
客燕知時節浮雲看世情
江鄉歸夢遠旅食鬢華盈
一曲折楊柳淒涼奏未成

齋居

齋居多暇日高臥又深秋
敝屋支風雨中宵望斗牛
嘯歌人事倦戎馬異鄉愁
休問升沈理吾生一白鷗

送陳頌南

時以御史奉
回福建泉州練勇

命

潞水輕帆送客行
國門回首暮雲橫
與君相見更何日
江海滔滔萬里情

誰識

誰識東方是謫仙，金門寄跡得安便。
青鞵布襪隨吾分，秋蟀春鷓契所天。
長日米鹽忘活計，畢生心事向殘編。
屋頭紅日三竿上，繞巷車聲不礙眠。

紀聞

時賊匪回竄湖北漢陽等郡縣復失守

江鄉烽火後，民氣未全蘇。
蠹爾豺狼類，猶稽斧鉞誅。
中原空杼軸，南國竭膏腴。
天塹誰憑恃，難言今古殊。

今年不見市菊者感賦

京國風光憶昔年，傳箋挈榼事聯翩。
等閒忽復重陽過，

不見黃花伴客筵

孔繡山同年以其室方孺人學紡圖屬題

養蠶書作韓來安其事肇自齊魯間

韓理堂先生令安徽來安時勸諭養

蠶募充沂人教之嘗著養蠶成法一卷先生名夢周山東濰縣人

亦有當年陳太守黔

中槲繭行已久

乾隆初陳公省菴爲貴州遵義府知府以山東槲繭之法徧教鄉村民婦食利

至今不衰公名玉璽歷城人

紡棉之法尤易擅布帛利興紈綺賤北

方婦女競習此不用長官來相勸服奇嗜淫天所悲舟車估貨爭狂馳國家第一重根本錦繡那抹寒與飢窮工祇解媚七尺顛倒縫人較寬窄邇來巧樣聞閨中風

俗如斯堪太息江南江北烽煙高盜賊滿地紛如毛此
離可歎萬千室寒女失業空嗷嗷鷄鳴戒旦風人義相
夫早致公卿位願君此圖不可忘百萬蒼生仰衣被

彭味之

久餘

齋中江漢圖

味之江夏人
時官給事中

宦游寥落滯長安烽火驚心歲欲闌南望故鄉歸不得
就君時展畫圖看

柬友

衰柳殘楓處處愁漫天風雪一廬幽端居慚運陶公璧
厚誼難期白傅裘何日江湖銷戰伐與君文酒恣遨遊

經營自付毫無補極目南雲淚莫收

夢回

鐘鼎山林兩不如眼前計較愧迂疏他鄉王粲頻登眺
傲性張融愛索居醉後且忘天下事憂來或讀道家書
夢回五夜心如洗皓魄沈沈映滿除

得徐懿父書

尺書天外至後會渺難論期爾享黃髮閒吟臥故園
荒文字賤世難布衣尊張觸經年事宵長役夢魂

得戴存莊書

與君別後年華改回首離亭艸未除詞賦飄零江渚感
宦情潦倒鬢毛疏可憐烽火千山路忽得良朋一紙書
攜手更知何日事北風自古歎虛邪

音徐

三軍

三軍思一戰十月駐津門已遣潘王戍誰知義旅尊天
邊頻節鉞釜底贖游魂新奉

彤廷詔休忘挾纊恩

時有獎

天津義勇

旨褒

偶成

他鄉廬旅久故里信音稀艸木驚時晏風霜勸客歸蕭

條懸壁劍寂寞釣魚磯
膾有中宵夢長吟返翠微

答潘絳廷前輩

曾綬

予家漢上子東吳蹤跡天涯興未孤
鄉里幾人謀下澤文章何日稱去聲
潛夫金龜擲去尊仍罄白社留題筆
欲枯不用升沈愁我輩早將笳鼓靖
江湖

孔繡山將求天下古今說經之書藏于闕里名曰
致經堂徵詩紀事

儀鄭堂上書盈尺微言什一存千百

儀鄭堂者弊軒檢討廣森所居著述

甚多尼山嶽嶽瞻日星辭達一言奧獨闢漢宋樹界爭鴻

溝小儒識解紛啁啾張目奮髭不相下潢斷港絕皆涓
流千百年來就凌替悲哉經義誰冥搜輪扁之語徒貽
笑麟書虹玉將奚求致經要自孔庭始尊道遺編垂要
旨致經之語本于陸桴亭先生思辨錄先生
名世儀明末諸生沒後門人謚尊道先生它年負笈
東郡游先向君家叩詩禮

哀徐鏡谿

啟山 時佐呂侍
郎幕死舒城之難

湯侯

海

座上昔相見倚醉吟詩十五年風雨懷君今已

矣

鏡谿曾爲予題
風雨懷人圖

巢湖西望淚潸然

野寺壁間畫松

畫裏逢君倦眼醒故山風籟耐人聽荒唐不作求仙想
且把長鏡劖茯苓

戴存莊寄近刻詩有庚戌雪夜對酒見懷長篇賦
答一律

不見寒巖老逢君餘緒論冥心臻絕詣昭昧得名言

存莊

自言爲詩得力于其師方植之翁東樹昭昧詹言一書植翁曾畫寒巖獨往圖

遙想桐山下空

孤雪夜樽年光嗟俛仰極目甲兵屯

詩中敘庚戌春京邸友朋聚談之樂

不禁
慨然

題聖學入門書後

明季陳確庵先生瑚著

安道斯編在

門人謚曰安道先生

冀東世運成浮生非鹵莽公等

豈沽名凋瘵時難說先民事可程道南耆舊盡薪火得

微明

題黃香鍊翁讀白華艸堂二集後

此集多在京中作

故人昔窮巷日夕每相存十載風光異千秋詩卷尊憂
時懷隱語謾世媿金門繫馬經過地槐花落徑繁

君在都時

寓冰窖巷

中試館

段芳山

承寶

屬題尊甫萍香文遺照

文會爲四川州牧歸後與

南昌諸名輩

爲九老會

一時耆舊聚章門詩酒風流誼共敦陸氏荒莊今日改
貞元朝士幾人存名留蓮社新篇富德在桐鄉祀事尊
物換星移懷往蹟滕王閣畔夕陽昏

哀天津令

謝君名于澄知天津縣事素有聲率帶義勇甚眾人皆悅服十一月下旬獨流

鎮之戰君死焉事聞于

朝

贈布政使銜並騎都尉世襲

津門駐軍六十日賊據深壕不敢出天寒地凍人煙稀
我兵枯守飢無食黃雲莽莽腥風寒戰場日落飛烏鳶
十萬義旅同聲哭可惜

天朝好縣官

野行過城南廢寺歸飲酒家

水落見荒宇淒涼客偶經民生方落寞僧寺亦飄零
鴉噪風痕聚樵歸晚唱聽酒家何處覓沈醉盞休停

東蔡季瞻御史

紹洛二首

屈指吾家事惟君知最深封章九霄上文獻百年心
賢里人皆式豐碑獸不侵兵戈今擾攘目斷白雲岑

先大父給

事公墓在漢陽之鄉
十餘年未晨謁也

走馬長安道君勞我未開放歌猶少壯閱世識艱難
生理憑誰卜山林未易攀師門愧期許

謂小沙師
君之兄也

回首淚

潺湲

世事

世事無端變幻頻，須眉那識本來真。
鷄蟲得失無休息，梅葛酸寒莫問人。
恥向眾中效鸚鵡，飽看椽上識麒麟。
麟出門目斷西山色，萬古嗟峨閱市塵。

題變雅堂詩後二首

國初黃岡杜
茶村先生潛著

一曲秦淮月色涼，飢來弄筆寫滄桑。
幾經戎馬身還在，海內人傳變疋堂。

淪落天涯亦可哀，故山迢遞夢魂回。
憐才獨有龔涇水。

許汝清狂入座來

書孫壽垣

丙章

安慶大觀亭遊記後

記畧云昔黃直卿知安慶

金人入寇江之南獨恃以無恐明宸濠叛王文成亦慮賊越安慶不可復制安慶守而南北之窺伺者莫敢逞其形勢然也記作于道光丁未孟春同游者爲黃君子榦子榦坊刻此文于舟車吟草後

屹然江上一亭雄南北津區顧盼中江水無情自東去

傷心不獨弔余公

余忠宣公墓在亭側

望津南捷音

咫尺

皇威在游魂汝敢逃凱歌諸將事盱食

一人勞欲別梟鸞類須憑豹虎韜安危天下望毋負此旌旄

食臘八粥

京師頒粥賑歲以孟冬朔有

詔先

去聲

三旬頗聞歡聲作

今年五城設廠施粥以九月初一日爲始

天子念民饑未事謀先著毋令根本地眾心失依託北風戒嚴寒比戶霜霰落迢遞屆令辰俯仰動驚愕幼年嗜飲啖沈吟事如昨攬鏡顛毛非童心苦難縛一笑稱吉祥釜盎仍交錯勝味傾醜醜法果恣吞嚼婦子忻團

藥餘粒僮媪樂食既長歎吁蒿目念民瘼勞生百無能
覲顏矜儒略于茲幸安飽莫謂天公薄南國滿旆旌農
田鮮刈穫北土秋水井里紛剽掠妖氛久未掃流離
繞城郭絡繹兵車來餽糧不盈橐念之能毋傷儻類值
屯剝長安百萬家歌舞競揮霍酒肉填朱門不知有藜
藿今歲物產艱稍稍趨簡樸願懷天下憂長此崇儉約
浩劫憐生民倉皇轉溝壑振羽皆蜉蝣處堂乃燕雀宴
安毒所萌沈溺胡罔覺悔禍既澹災憂心在風鶴儒生
侈迂言聞者任嘲噓聊冀空王靈涵濡視齋獲衽席眾

舉安寰海慶耕鑿

得漢上書

述九月賊竄湖北事

展讀難終紙斯民可奈何江湖頻戰伐劫掠到巖阿十月雷聲怒陰風賊艇多天心應厭禍南望涕滂沱

酒舍與孔繡山飲

吾儕傲骨自嶙峋迂拙何嫌眾目瞋中歲文章餘結習他鄉杯酒見交親漫嘲漢代金門隱轉羨堯天石戶民相顧茫茫漸華髮長途日日送黃塵

題載鵝圖

并序

道光初

宣宗成皇帝巡

盛京舉秋獮之典張詩舫丈

詳河

以軍機章京與隨扈

之役有餽生鵝者籠于駝裝之上行

御道旁鵝鳴

上知爲從臣物顧而笑焉丈旋奉

命觀察轉漕山左漸歷河南按察使皆載鵝以行追維
前事二十餘年矣其友孔繡山舍人爲文記之作此圖
者秦宜亭炳文也

鵝籠邀一笑往事記

先皇蹕路軍容盛關山曉色涼
臣原鷗鷺侶時際鳳鸞翔
翔內史休同話

深恩未可忘

歲莫與吳稼軒飲

京華名利場冠蓋多反覆
袞袞門外塵終古恣徵逐
朝游甫華堂未夕騰怨讎
于茲發深慨斯道何能淑
沈沈歲將盡爾我尊相屬
酒樓俯大道鎗光動醞醑
世事休放歌吾儕且庸碌
韶鳴思后夔水深惜獨漉
嗟哉方寸

心廊廟一林谷腰下利劍光摩挲空躑躅天方未厭禍
兵燹若星速追憶承平時廿載軫胸目游蹤等儻徇物
理憑往復靈臺自炯炯黽勉抱茲獨獨立宇宙間靜觀
此化育

新年

未識新年樂羣生亦已勞畿疆愁戰伐闔閭困錢刀書
厭塵埃曠宵聞雁鷺號憂勤惟我
后飽食愧吾曹

除夕

天涯忽復逢除夕風雪蕭疏酒滿樽
鷄肋漫矜游宦味鷗盟久負故交言
江湖計日銷羣盜井里無憂慰
至尊更祝滄溟波浪靜不妨吉語寫駢蕃

敦夙好齋詩初編卷十二終

男愚頤校字